


TEZAUUR LITURGIC

17 AUGUST

**ACATISTUL
SF. CUVIOS
PIMEN
MIAȘNIKOV
DE LA UGREȘ**



MOSCOVA, 2000



Акафист

прп. Пимену Угрешскому

Кондак 1

Избранный от Воеводы Сил Небесных Господа Иисуса Христа, обители Угрешския возобновителю, преподобне отче наш Пимене, яко имеяй велие дерзновение к Богу, молися выну о спасении душ наших и избавлении нас от всяких бед и напастей, да зовем ти: Радуйся, Пимене, теплый о нас пред Богом молитвенниче.

Икос 1

Ангельский образ от юности возлюбив, всего себе предал еси Господу и мира злокозненного отреклся еси, и был еси истинный монах. Сего ради мы воспеваем ти сице:

Радуйся, родителями твоими во благочестии возвращенный;

радуйся, Отца Небеснаго сыне, благодатию озаренный.

Радуйся, земное отечество твое, град Вологду, святостию прославивый;

радуйся, к Небесному Отечеству от юности устремивыйся.

Радуйся, Священное Писание, еще отрок сый, читати возлюбивый;

радуйся, Алфавит Духовный изучая, заповеди Божий познавай.

Радуйся, Пимене, теплый о нас пред Богом молитвенниче.

Кондак 2

Видя множество страстей от диавола, борющихся, преподобне Пимене, возопил еси ко Господу и, получив благодатную помощь, Тому воспел еси: Аллилуия.

Икос 2

Разум Божий желая хотя отчасти уразумети, преподобне Пимене, Священное Писание усердно читал еси еще юн сый и в старости маститей, сего ради Бог искомому ты приобщи. Мы же, свое невежество разумеюще, глаголем ти:

Радуйся, во отрочестве старцем Божиим во благочестии наставленный;

радуйся, от юности навыкнувший богоугодному добронравию.

Радуйся, Феофана Новоезерскаго и Льва Оптинскаго зрети и слушати сподобльшийся; радуйся, блаженнаго Николая Вологодскаго предречения удостоивыйся.

Радуйся, к Антонию Радонежскому совет имевый;

радуйся, святителя Филарета Московского
благословение на устройство общежития
исполнимый.

Радуйся, Пимене, теплый о нас пред Богом
молитвенниче.

Кондак 3

Силою Бога Всевышнего, всельшеюся в тя,
преподобне Пимене, возлюбил еси ближних и
явился еси алчущим питатель, нищим и сирым
защитник, недугующим помощник, поя
Подателю всех благ Богу: Аллилуия.

Икос 3

Имея искреннее послушание ко святителю
Филарету, преподобне Пимене, Угрешскую
обитель обновил еси и яко иную Лавру соделал
есй, сего ради мы благодарственно поем ти:
Радуйся, прибыв в Угрешскую обитель,
ангельское пение услышавый;
радуйся, сие пение, яко благодать, до кончины в
сердце сохранивый.
Радуйся, монашеское общежитие во Угрешстей
обители учредивый;
радуйся, сие, яко наилучший путь ко спасению,
прославивый.
Радуйся, видением птиц велиих, на Угрешу
летающих, обрадованный;

Радуйся, сие видение яко знамение
благоволения Божия приявый.

Радуйся, Пимене, теплый о нас пред Богом
молитвенниче.

Кондак 4

Буря недоумения смущает ми ум, како по
достоянию воспети труды твоя, преподобне отче
Пимене, имиже трудился еси во славу Единого
Истинного Бога, Емуже мы со ангелы воспеваем:
Аллилуия.

Икос 4

Слышавше благочестивии людие о трудех и
подвизех твоих, преподобне Пимене, притекоша
к тебе, яко истинному пастырю, и принесоша
дары, да обновиши Угрешскую обитель. Мы же,
яко дар, приносим тебе хвалы сия:

Радуйся, к покаянию во гресех и смирению
люди приводяй;

радуйся, во оных упование о спасении в Бозе
утверждаяй.

Радуйся, дарми благодетелей Угрешскую обитель
обновивый;

Радуйся, сердца тех пастырскою любовью
согревый.

Радуйся, благодетелем Угрешския обители
бывый истинный наставник;

Радуйся, о тех присный богомольниче.
Радуйся, Пимене, теплый о нас пред Богом
молитвенниче.

Кондак 5

Боготечная звезда явился еси множеству
монахов, преподобне Пимене, наставляя и
окормляя их ко спасению и научая присно Богу
взывать: Аллилуия.

Икос 5

Видевше желающии жития иноческаго, яко во
Угрешстей обители общежитие монашеское и
благочиние хранимо есть тобою, преподобне
Пимене, стекахуся во множестве к тебе. Мы же,
прославляюще о тебе Господа Бога, вопием ти:
Радуйся, равноангельнаго жития образ
истинный нам явивый;
радуйся, жаждавших вступить на путь
иноческий с любовью во обитель приимавый.
Радуйся, провинившихся иноков увещаньми
своими к слезному раскаянию приводивый;
радуйся, овцы Христовы на живоносных
пажитех воспитавый.
Радуйся, иноческаго общежития велегласный
проповедниче;
радуйся, паствы твоя добрый наставниче.
Радуйся, Пимене, теплый о нас пред Богом

молитвенниче.

Кондак 6

Проповедницы Христа Бога бывше ученицы
Угрешскаго училища, благодариша тя,
преподобне Пимене, яко истиннаго отца и
учителя, поюще Богу: Аллилуия.

Икос 6

Возсиял еси в земли Московстей, преподобне
Пимене, яко светильник, Богом возжженный,
темже множество людей стекахуся во
Угрешскую обитель видети и слышати тя. Мы
же, память твою творяще, вопием сице:
Радуйся, Московстей земли негасимый
светильниче;
радуйся, светом Христовым просвещаяй души
наша.
Радуйся, обуреваемым душевными скорбьми
утешителю;
радуйся, недугующим болезнями помощниче.
Радуйся, от находящих обстояний молитвою
ограждай;
радуйся, о просящих помощи Божия
ходатайствуяй.
Радуйся, Пимене, теплый о нас пред Богом
молитвенниче.

Кондак 7

Хотя душу твою спасти, мир Божий стяжал еси
внутри себе, преподобне Пимене, темже и
спасахуся окрест тебе множество душ,
благодарственно поющих Богу: Аллилуия.

Икос 7

Новаго тя Пимена почитаем, преподобне отче,
наставника монахов и собеседника ангелов,
стадо словесное, врученное ти Богом, добре
пасуща. Сего ради ублажаем тя, вопиюще:
Радуйся, словесных овец добрый пастырю;
радуйся, тезоименному ти Пимену Великому
подражателю.

Радуйся, труды ради Бога и ближняго
возлюбивый,;

радуйся, празден никогдаже пребывый.

Радуйся, о гресех и немощех твоих рыдавый;

радуйся, паству к покаянию призывавый.

Радуйся, Пимене, теплый о нас пред Богом
молитвенниче.

Кондак 8

Странника и пришельца себе на земли быти
помышляя, час кончины твоея пред очима
твоима присно имел еси и сего ради к вечному
животу стремился еси, поя Богу: Аллилуия.

Икос 8

Был еси всем воистину пастырь добрый,
преподобне Пимене, такожде и питатель,
помощник и защитник, нам же ныне ты еси
молитвенник усердный и ходатай у престола
Владычня, сего ради восхваляем тя сице:
Радуйся, пастырскою любовью приходящих к
тебе объемлющий;
радуйся, упованием о Христе оныя радующий.
Радуйся, алчущих безмездный питателю;
радуйся, нуждающимся странноприимницы
устроителю.
Радуйся, наипаче о душах пасомых пекийся.
Радуйся, и телесныя нужды тех заботою не
оставляяй.
Радуйся, Пимене, теплый о нас пред Богом
молитвенниче.

Кондак 9

Всякия скорби и болезни со смирением
претерпел еси, преподобне Пимене, никогдаже
прекословя воле Господни, но благодарственно
поя Богу: Аллилуия.

Икос 9

Ветии многоучени недоумевают, како ублажати
тя, преподобне Пимене, не от человеческия
мудрости, но от премудрости Божия разум

приемшаго; сего ради мы возглашаем ти
сицевая:

Радуйся, во Христе премудрость Божию
возлюбивый;

радуйся, делами заповеди Божий познавый.

Радуйся, лествицу добродетелей законно
прошедый;

радуйся, нищету духа и смирение во главу угла
поставивый.

Радуйся, скорби и болезни с терпением понесый;
радуйся, прощения просити у меньших себе
навыкнувый.

Радуйся, Пимене, теплый о нас пред Богом
молитвенниче.

Кондак 10

Спастися в Бозе хотяй, всего себе покорил еси
воле Божией и даже до смерти ничтоже о себе
высокая помыслил еси, преподобне Пимене, но
яко раб труждаяся по вся дни, сын Божий по
благодати во Царствии Небеснем явился еси, поя
Богу: Аллилуия.

Икос 10

Стена еси монахом, прибегающим с верою к
тебе, преподобне Пимене, ибо делом и словом о
иноческом житии ревновал еси, темже и нас,
подвиги твоя ублажающих, от всяких напастей

защити, вопиющих к тебе таковая:
Радуйся, монашеское звание и благочестие
возлюбивый;
радуйся, еже утвердити общежитие в
монастырех московских ревновавый.
Радуйся, благоговейный Таин Божиих
служителю;
радуйся, церковного устава строгий
блюстителю.
Радуйся, к клеветавшим на тя благодушие
стяжавый;
радуйся, на волю Божию, но не человеческую
полагавыйся.
Радуйся, Пимене, теплый о нас пред Богом
молитвенниче.

Кондак 11

Пение святителю Николаю со усердием
приносил еси, преподобне Пимене, обитель того
обновляя и люди ко прославлению чудес того
призывая и научая о всех и за вся благодарити
Бога: Аллилуия.

Икос 11

Светозарную лучу во мраце разорения
Угрешския обители от безбожных зрим тя,
преподобне Пимене, ты бо, не убоаяся скудости
вещественныя, добрый и искусный строитель

тоя был еси, образ упования на Бога нам являя,
сего ради восхваляем тя сице:

Радуйся, Угрешския обители возобновителю;
радуйся, и нам в возрождении тоя помогаяй.

Радуйся, трудами, болезнью и молитвою
братию во Угрешскую обитель собравый;
радуйся, и ныне о братии обители твоея усердно
молящийся.

Радуйся, еще жив сый, все упование твое на
Бога возложивый;

Радуйся, и в преставлении твоём к Богу нас не
оставляющий.

Радуйся, Пимене, теплый о нас пред Богом
молитвенниче.

Кондак 12

Благодать Духа Святаго стяжав, преподобне
Пимене, ныне всем требующим подаеши ю
независтно, со дерзновением престола Божию
предстоя и моляся о нас, поющих Богу:
Аллилуия.

Икос 12

Поюще обретение честных мощей твоих,
преподобне Пимене, и благодатную помощь,
тобою нам подаваемую, прославляем Бога,
прославляющаго святых Своих, и воспеваем тебе
сице:

Радуйся, от святителя Филарета благословение
Божие на обновление Угрешския обители
получивый;

радуйся, яко сам ныне в сонном видении паки
возобновити обитель повелевый.

Радуйся, яко у места погребения твоего
ангельское пение слышано бысть;

радуйся, яко честныя мощи твоя ныне
чудодействуют.

Радуйся, яко у престола Божия об обители твоей
ходатайствуеши,

Радуйся, яко и за всех молящихся тебе тепле
предстательствуеши.

Радуйся, Пимене, теплый о нас пред Богом
молитвенниче.

Кондак 13

О пастырю добрый и ревнителю монашеского
чина, о Угрешстей обители присный ходатаю на
Небеси, преподобне Пимене, нынешняя наша
приими приношения и моли Христа Бога
избавитися нам вечнаго осуждения, да
предстояще одесную Его, с тобою воспеваем:
Аллилуия.

Сей кондак читается трижды, замет 1-й икос и
1-й кондак.